



Na osnovu člana 8. stav 2. tač. c) i d) Zakona o statistici Bosne i Hercegovine («Službeni glasnik BiH», br. 26/04 i 42/04), Agencija za statistiku Bosne i Hercegovine donosi

ODLUKU o uvođenju i primjeni klasifikacije zanimanja

I. OPĆE ODREDBE

Član 1. (sadržaj odluke)

Ovom odlukom se utvrđuje klasifikacija zanimanja (u daljnjem tekstu: KZBiH-08) kao obavezan nacionalni statistički standard, koji se upotrebljava pri evidentiranju, prikupljanju, obradi, analiziranju, prenosu i iskazivanju statističko-analitičkih podataka, bitnih za praćenje stanja i kretanja na socijalno-ekonomskom području.

KZBiH-08 se koristi kao statistički standard za razvrstavanje poslova odnosno zanimanja u grupe zanimanja u službenim odnosno administrativnim zbirkama podataka (evidencije, registri, baze podataka), u statističkim istraživanjima i u statističkim registrima, čime se obezbjeđuju konzistentni podaci za statističko, analitičko i naučno praćenje strukture zanimanja aktivnog stanovništva, kao i potraživanja za poslom.

Član 2. (značenje izraza)

Pojedini izrazi u ovoj odluci imaju sljedeće značenje:

- zanimanje je statističko-analitička kategorija u koju se razvrstavaju poslovi i radni zadaci srodni po sadržaju i zahtjevnosti, koje je obavljala, obavlja ili bi mogla obavljati u pravilu jedna osoba koja posjeduje odgovarajuća znanja, sposobnosti i vještine;
- naziv zanimanja/posla je riječ ili fraza koja se upotrebljava za označavanje određenog zanimanja/posla, koji obavlja jedna osoba;
- grupu zanimanja čini zanimanje ili više zanimanja koji su slični po nivou znanja, odnosno prema vrsti znanja, koje je potrebno za kompetentno obavljanje poslova i zadataka u zanimanju;
- šifra grupe zanimanja je brojana oznaka grupe zanimanja;
- struktura KZBiH-08 je sistematski popis hijerarhijski povezanih grupa zanimanja, označenih šiframa i nazivima;
- šifarski popis KZBiH-08 je popis grupa zanimanja, kojem su dodani nazivi zanimanja/poslova koje obavlja jedna osoba.

II. KLASIFIKACIJA ZANIMANJA

Član 3. (osnova)

KZBiH-08 se zasniva na Međunarodnoj standardnoj klasifikaciji zanimanja (International Standard Classification of Occupations, ISCO-08), koja se prema preporuci Međunarodne organizacije rada primjenjuje kao međunarodni standard od 6. decembra 2007.



Član 4.
(struktura)

KZBiH-08 ima hijerarhijsku strukturu. Zanimanja se udružuju, odnosno kombiniraju u grupe zanimanja na četiri klasifikacijska nivoa, i to:

- prvi klasifikacijski nivo je glavna grupa zanimanja, označena jednocifrenom šifrom i nazivom,
- drugi klasifikacijski nivo je podgrupa zanimanja, označena dvocifrenom šifrom i nazivom,
- treći klasifikacijski nivo je područna grupa zanimanja, označena trocifrenom šifrom i nazivom,
- četvrti klasifikacijski nivo su jedinice područnih grupa zanimanja, označene četverocifrenom šifrom i nazivom.

Struktura KZBiH-08 je u prilogu ove odluke i njen je sastavni dio.

Član 5.
(pomoćna dokumentacija za primjenu KZBiH-08)

Agencija za statistiku Bosne i Hercegovine (u daljnjem tekstu: Agencija) će pripremiti pomoćnu dokumentaciju koja će omogućiti lakšu i jedinstvenu primjenu KZBiH-08, i to:

- opća metodološka objašnjenja KZBiH-08,
- opise grupa zanimanja KZBiH-08,
- šifarski popis zanimanja KZBiH-08.

Agencija će pomoćnu dokumentaciju javno objaviti na svojoj Internet stranici.

Član 6.
(održavanje i usklađivanje KZBiH-08)

Agencija je zadužena za provođenje ove odluke, za održavanje KZBiH-08 i pomoćne dokumentacije iz člana 5. stav 1. odluke, kao i za usklađivanje KZBiH-08 s Međunarodnom standardnom klasifikacijom zanimanja (ISCO).

III. PRELAZNE I ZAVRŠNE ODREDBE

Član 7.
(objavljivanje pomoćne dokumentacije za primjenu KZBiH-08)

Pomoćnu dokumentaciju iz člana 5. stav 1. ove odluke Agencija će javno objaviti na svojoj Internet stranici, najkasnije do 31. 12. 2010.

Član 8.
(prestanak važenja klasifikacija zanimanja koje su u primjeni)

Do početka primjene KZBiH-08 potrebno je izvršiti usklađivanje s ovom odlukom drugih klasifikacija zanimanja koje su u primjeni na teritoriji Bosne i Hercegovine.

Član 9.
(početak primjene KZBiH-08)

Ova odluka stupa na snagu narednog dana po objavi u «Službenom glasniku Bosne i Hercegovine», a primjenjivat će se od 1. januara 2011.

Broj:
Sarajevo, dana